

თსუ გერმანიაში ჩავიდა

საქართველოს მოქმედი ჩემპიონი თსუ, რომელიც ქართული გუნდებისთვის 5-წლიანი პაუზის შემდეგ დაბრუნდა ევროასპარეზოზე, გერმანიაში გაემგზავრა. ჰანოვერიდან 100 კილომეტრით დაცილებული მყუდრო, საუნივერსიტეტო ქალაქი გიოტინგენი საკალათბურთოდაც საკმაოდ აქტიურია და ბუნდესლიგაში საკმაოდ კონკურენტუნარიანი გუნდი ჰყავს, რომელიც ფიზა ევროპის თასზე ასპარეზობს.

თსუ ფიზა ევროპის თასზე ფიზა-ს ჩემპიონთა ლიგის საკვალიფიკაციოდან მოხვდა. ლექსო ლაფანაშვილის გუნდმა საკვალიფიკაციო ბარიერი ვერ დაძლია და დებულების თანახმად, ფიზა ევროპის თასის ჯგუფურ ეტაპზე გადაინაცვლა. თავის მხრივ, ამ ტურნირსაც ჰქონდა საკვალიფიკაციო ეტაპი, თუმცა ჩემპიონთა ლიგიდან გადმოსული გუნდები პირდაპირ ჯგუფში მოხვდნენ.

4-გუნდიან ჯგუფში გერმანულ გიოტინგენთან ერთად თსუ-ს მეტოქედ იტალიური ვარეზე და კვიპროსული კერავნოსი ჰყავს. ლექსო ლაფანაშვილის გაწვრთნილი გუნდი გერმანიაში პირველი ტურის სათამაშოდ შესუსტებული შემადგენლობით ჩამოვიდა. გუნდს ვერ გამოჰყვა ეროვნული ნაკრების რეკორდსმენი (216 მატჩი) გიორგი ცინცაძე, რომელსაც დუდუ დადიანის ნახევარფინალში ნატკენი ნეკნი აწუხებს.

თსუ-ელებმა დაიმატეს ამერიკელი ფორვარდი კამერონ კრენსტონი, რომელიც უნივერსიტეტელებს გერმანიაში ახლავს, თუმცა სავარაუდოდ თამაშში მონაწილეობას არ მიიღებს. მიზეზი ისაა, რომ კრენსტონმა ბოლო 4 დღიდან 3 მგზავრობაში გაატარა და თსუ-ს გერმანიაში გამომგზავრების წინა ღამეს შეუერთდა და გუნდთან პირველ ვარჯიშს გიოტინგენში ჩაატარებს.

თსუ გერმანიაში 10 კალათბურთელით ჩავიდა:

ნიკა ჩეჩელაშვილი, ტაირი ბოიკინი, ნოდარ გოგოძე, კახა ჯინჭარაძე, გიორგი კოპაძე, გიორგი ტურშილაძე, ალექსანდრე მგელაძე, კამერონ კრენსტონი, ალექსანდრე ფევაძე, ნიკოლა ვუიოვიჩი.

ლაფანაშვილის გუნდი გერმანიაში 17 ოქტომბერს, გამთენიისას გაემგზავრა და ქალაქ ჰანოვერში დილის 11:00 საათზე ჩაფრინდა, საიდანაც ავტობუსით საათნახევრიანი მგზავრობის შემდეგ გიოტინგენში ჩავიდა და სასტუმრო Am Papenberg-ში დაბინავდა. თსუ პირველ ვარჯიშს დღეს, თბილისის დროით 21:00 საათზე იმ დარბაზში გამართავს, სადაც ხვალ გიოტინგენს დაუპირისპირდება.

თსუ-მა გიოტინგენის დარბაზში ივარჯიშა

გერმანიაში ფიზა ევროპის თასის მატჩის სათამაშოდ ჩასულმა თსუ-მა გიოტინგენის დარბაზში პირველი ვარჯიში გამართა. დაახლოებით 2000 ათას მაყურებელზე გათვლილ დარბაზში ლექსო ლაფანაშვილმა თავის ასისტენტებთან - დიმიტრი ჭელიძესთან და ნიკა მსხალაიასთან ერთად გუნდი ზედმეტი დატვირთვების გარეშე, ძირითადად კომბინაციებზე ავარჯიშა.

სოლიდური ნაწილი მოთელვებს დაეთმო, რადგან ნამგზავრ კალათბურთელებს ტონუსი აღედგინათ და ვარჯიშს ფორმაში შეხვედრილიყვნენ. როგორც ცნობილია, თსუ გიოტინგენში ნაკლული შემადგენლობით იმყოფება. გუნდს გერმანიაში ვერ გაჰყვა გამთამაშებელი გიორგი ცინცაძე, რომელსაც ტრავმა აწუხებს, ხოლო რატი ანდრონიკაშვილს წინა კლუბისგან გათავისუფლების ფურცელი ჯერ არ მიუღია და თსუ-ში ჯერ არ იმყოფება. ამიტომაც სამატჩო განაცხადში არსებულ 12 მოთამაშის ადგილს თსუ გიოტინგენთან მატჩში ვერ შეავსებს.

გუნდთან პირველი ვარჯიში გამართა ამერიკელმა კემერონ კრინსტონმა, რომელიც გუნდს გერმანიაში გამომგზავრებამდე შეუერთდა. გიოტინგენში ჩატარებული პირველი ვარჯიშის შემდეგ ჯერაც უცნობია, მიეცემა თუ არა კრინსტონს მოედანზე გასვლის საშუალება.

თსუ გიოტინგენის დარბაზში დღეს დილის 11:00 საათზე მსუბუქად, ძირითადად სროლებში ივარჯიშებს, ხოლო ფიზა ევროპის თასის ჯგუფური ეტაპის პირველ მატჩს გიოტინგენთან 19:30 საათზე (თბილისის დროით 21:30) ჩაატარებს. ევროპული ტურნირის მორიგი მატჩი თსუ-ს ერთ კვირაში, 25 ოქტომბერს, თბილისში, კვიპროსულ კერავნოსთან ელის.